

इवनिंग डोगरी न्यूज बुलेटिन

समे .18:15 Hrs

<><><><><><>

### Headlines

1. संसद दे दौनें सदनें दी कार्यवाही विरोधी धड़ें दी डंड रौली दे चलदे कल्लै तोड़ी स्थगित।
2. उपराज्यपाल मनोज सिन्हा होरें आखेआ ऐ जे राई-बाई दे क्षेत्र च टिकाऊ विकास लेई निगगर नवाचार ते आधुनिक टेकनालजी दे इस्तेमाल दी मती लोड़ ऐ।
3. मुखमंत्री उमर अब्दुल्ला होरें राई-बाई दे क्षेत्र च विद्यार्थि, अध्यापक ते कृषि वैज्ञानिके दी भूमिका गी उजागर करदे होई करसान केंद्रित नमिएं काहड़ें पर जोर दिता गेआ।
4. किशतवाड़ जिले दे मढ़वा ब्लॉक गी प्रतिष्ठित नीति आयोग सम्मान दिता गेआ ऐ।
5. ते क्रिकेट च च भारत नै इंग्लैंड खिलाफ एंडरसन तेंदुलकर ट्रॉफी दे खीरले टेस्ट मैच च 6 रन्जें कन्नै जित हासल करियै श्रृंखला गी बरोबरी पर लेई आंदा ऐ।

<><><><><><>

### Parl.Adjourned

संसद दे दौनें सदनें दी कार्यवाही अज्ज दिन भरै लेई स्थगित करी दिती गई। राज्यसभा दी कार्यवाही, झारखंड मुक्ति मोर्चा दे सीनियर लीडर, साबका मुखमंत्री ते मजूदा सांसद शीबू सोरेन होरें गी श्रद्धांजलि देने दे बाद स्थगित करी दिती गई जिंदा अज्ज बड़लै नमी दिल्ली च काल होई गेआ। तोआई, लोकसभा दी कार्यवाही बिहार च चला'रदे मतदाता सूचिएं दे व्यापक पुर्ननिरीक्षण गी लेइयै बरोधी धड़ें आसेआ जारी डंड रौली दे चलदे सदनें दी कार्यवाही पैहले दिन द'ऊ बजे तोड़ी ते फी पूरे दिनै लेई स्थगित करी दिती गई।

<><><><><><>

### LG SKUAST J Convocation

उपराज्यपाल मनोज सिन्हा ते मुखमंत्री उमर अब्दुल्ला होरें अज्ज स्कॉस्ट जम्मू दे 9में दीक्षांत समारोह च शिरकत कीती। अपने संबोधन च एल.जी होरें करसाने दी औंदन बदाने लेई ते उद्योग दे क्षेत्र च सरबंधें गी होर तगड़ा करने लेई इक मजबूत ते आधुनिक तकनीकें आहली परिस्थितिकी प्रणाली दी लोड़ बारै गल्ल कीती। एल.जी होरें आखेआ जे राई-बाई आहले क्षेत्र च नारी शक्ति उत्पादन गी बदाने च मता योगदान देआ'रदी ऐ। जलवायु परिवर्तन साबबे फसलें दी खेती, जैविक राई-बाई, फसलें गी कीड़े थमां बचाने आस्तै बवस्थाएं आहले क्षेत्र च महिला साइंसदाने दी भागीदारी नै अनमुल्ला योगदान दिता ऐ। मगरा मीडिया आहलें कन्नै गल्ल करदे होई उपराज्यपाल होरें आखेआ।

तोआई, इस मौके पर बोलदे होई मुखमन्त्री उमर अब्दुल्ला होरें आत्मनिर्भर जम्मू-कश्मीर बनाने लेई करसान केंद्रित शोध दा आहवान कीता। उनें नवाचार गी बढ़ावा देने च कृषि सरबन्धी साइंसदानें ते विद्यार्थियें दी भूमिका दी सराहना कीती। मुखमन्त्री होरें महिला विद्यार्थिएं दे शानदार प्रदर्शन दी बी सराहना कीती जेड़ी राई-बाई आहली शिक्षा ते शोध च इक शानदार मिसाल कायम करदियां न।

<><><><><><>

#### Itoo-Mandi Visit

पुंछ जिले च शिक्षा ते सेहत दिक्खभाल सरबन्धी ढांचे ते सुविधाएं च बेहतरी आहनने बक्खी अगड़े बधदे होई सेहत ते मेडिकल शिक्षा मन्त्री सकीना इतू होरें सरकारी डिग्री कालेज मंडी दा नीह पत्थर रक्खेआ। इस मौके पर बोलदे होई मन्त्री होरें प्रदेश दे दूर-दरेडे ते पिछड़े दे इलाकें च उच्च शिक्षा दे म्यार च बेहतरी आहनने दे सरकार दे धेड़यै गी पक्का कीता। उनें मंडी दे उपजिला अस्पताल च डायलिसिस युनिट दा बी उद्घाटन कीता जेदे नै गुर्दे दे मरीजें गी मती सहूलत होग ते हून ऐसे मरीजें गी डायलिसिस लेई दूर जा प्राइवेट अस्पताल चेन्नई जाना पौग। मन्त्री होरें उत्थे नमैं बनाए गेदे ओपीडी ब्लॉक दा बी उद्घाटन कीता। मगरा मीडिया कन्ने गल्ल करदे होई उनें आखेआ।

<><><><><><>

#### Gojri-Transation Workshop

श्रीनगर दे शोरे कश्मीर अंतरराष्ट्र कांफ्रेंस सेंटर च आई गोजरी दी पैहली-पैहली अनुवाद कार्यशाला दा सरिस्ता कीता गेदा ऐ जेदा उद्घाटन नेशनल बुक ट्रस्ट इंडिया दे चेयरमैन प्रो. मिलिंद सुधाकर मराठे होरें कीता। इस मौके ट्रस्ट दे मुख सम्पादक ते जायंट डरैक्टर कुमार विक्रम होरें आखेआ जे एह पैहली बारी ऐ जे ट्रस्ट आसेआ गोजरी भाशा दी अनुवाद कार्यशाला दा सरिस्ता कीता जा'रदा ऐ। उनें दस्सेआ जे 3 दिनें दे आयोजन दरान कताबें दे दऊं भाशाएं दे संस्करण तैयार कीते जांगन। एहदे च 15 अनुवादकें दे अलावा 2 माहिर बी हिस्सा लै करदे न। उनें आखेआ जे एहदे नै गोजरी भाशा दे सगोसार साहित्य गी विस्तार थहोग ते इस भाशा दे पाठकें दी पुज्ज दा दायरा बी बढोग।

<><><><><><>

#### Samba-Mansar Road

जम्मू-कश्मीर च बुनियादी ढांचे गी बढ़ावा देने दी इक महत्वपूर्ण दिशा च केंद्र सरकार आसेआ साम्बा-मानसर-उधमपुर शिड़कै गी चैड़ा करियै कन्नोकन्नी चउं गड़्डियें दे लंगघने जोग बनाने लेई मंजूरी देई दिती ऐ। 7 जहार 418 करोड़ रपे दी लागत आहलिएं परियोजनाएं जेहड़ियां केंद्री बजट च घोषत कीती गेई ऐ, इन्दा मकसद खिते च ट्रैफिक दे रश गी घट्ट करने दे कन्नोकन्नी राबते च सुधार करना बी ऐ। लोकसभा च साइंस जुगल किशोर शर्मा होरें एहदी तस्दीक करदे होई आखेआ जे एहदे कन्ने साम्बा ते उधमपुर बश्कार सफर करने च घट्ट समा लगगा करोग ते कन्ने गै बपार, सैलसफा ते आर्थिक विकास गी बी बढ़ावा थहोगं उनें गलाया जे शिड़कै दे बेहतर राबिते कन्ने मकामी लोकें गी आओजाई च सखाल होग ते धार्मिक थाहरें पर औने आहले तीर्थयात्रुएं गी बी फायदा होग। इस परियोजना लेई केंद्र सरकार दा आभार जतांदे होई सांसद जुगल किशोर शर्मा ते इत्थूं दे मकामी लोकें शिड़क यातायात

सरबन्धी केंद्री मंत्री नितिन गडकरी हुंदा जम्मू-कश्मीर च शिडकें दे विकास गी प्राथमिकता देने लेई धन्नवाद कीता।

<><><><><><>

Aspirational Block

किश्तवाड़ जिले दे अकांक्षी ब्लाक मड़वा गी प्रतिष्ठित नीति आयोग सम्मान हासल होआ ऐ। एह सम्मान समाजी तरक्की ते लोकें दे जीवन स्तरै गी उबड़ा चुक्कने लेई दिता गेआ ऐ। सम्मान समारोह किश्तवाड़ दे ऐतिहासिक चौगान मैदान च लग्गा जेदा उद्घाटन प्रधानमंत्री हुंदे दफ्तरै च राज्यमंत्री डॉ. जतिंद्र सिंह होरें वर्चुअल ढंगै नै कीता। इस मौके विधायक ते विपक्ष दे नेता सुनील शर्मा, किश्तवाड़ दे जिला विकास कमिशनर पंकज कुमार शर्मा ते बक्ख-बक्ख स्कूलें दे 500 कोला मते विद्यार्थी टीचर ते आम लोक बी शामिल होए ते ब्लाक दी इस शानदार उपलब्धि दे गवाह बनें नीति आयोग आसेआ अकांक्षी ब्लाक कार्यक्रम दी शुरुआत जनवरी 2023 च कीती गई ही। इस मौके पर बोलदे होई जिला विकास कमिशनर पंकज शर्मा होरें आखेआ।

<><><><><><>

JKSDM

जम्मू-कश्मीर कौशल विकास मिशन नै अज्ज जम्मू-कश्मीर दे सब्भनें 20एं जिलें च भारत कौशल प्रतियोगिता 2025 दी शुरुआत कीती। एह प्रतियोगिता कौशल विकास ते उद्यमिता मंत्रालय दी इक राश्ट्रव्यापी पहल ऐ जेदे तैहत मुख्य भरै थमां इनें प्रतियोगिताएं राहें हुनरमंद युवाएं दी ताल करियें उनेंगी सम्मानित कीता जाग। इस मौके पर बोलदे होई जम्मू-कश्मीर कौशल विकास मिशन दे मिशन डरेक्टर होरें आखेआ जे भारत कौशल प्रतियोगिता छड़ी इक प्रतियोगिता गै नेई ऐ, सगुआं एह इक ऐसा आंदोलन ऐ जेड़ा हुनर गी सशक्त करने लेई इक बड़ा महत्वपूर्ण जरिया ऐ।

<><><><><><>

3<sup>rd</sup> Cong. Camp

देसै दी सांस्कृतिक ते भाशाएं दी बन-सबन्नता दा जश्न मनाने दे मकसद कन्नै जम्मू च इक निजी स्कूल आसेआ अंतर स्कूली त्री भाशा प्रतियोगिता दा सरिस्ता कीता गेआ जेदे च जम्मू दे बक्ख-बक्ख 19 स्कूलें दे विद्यार्थिणें हिस्सा लैता। इस आयोजन दा मसकद बच्चें च अंग्रेजी ते हिंदी दे अलावा भाशा दे रूपै च डोगरी, संस्कृत, उर्दू, पंजाबी ते फ्रेंच भाशा गी अपनाने गी बढ़ावा देना ते विद्यार्थिणें आसेआ इक कोला मतिणें भाशाएं दा ज्ञान होने दे फेयदे बारै जागरूक करना हा। इस कार्यक्रम च संस्कृत च सतोत्र ज्ञान, उर्दू च गजलां, फ्रेंच च कविता पाठ, डोगरी भाख ते पंजाबी च सुतंत्रता सेनानिणें पर भाषण बी शामिल कीते गे जेड़े विद्यार्थिणें उन्दे आसेआ चुनी गेदी त्री भाशा च पेश कीते। मेजबान स्कूल दे त्री भाशा विभाग दिणें अध्यक्ष डॉ. गीतिका शर्मा होरें आखेआ।

<><><><><><>

## Announcement

आकाशवाणी जम्मू दे क्षेत्रीय समाचार एकांश आसेआ कल 5 अगस्त गी दपैही साइडे 12 बजे त्रिएं मिनटें दी इक बशेश परिचर्चा प्रसारित कीती जाहग जेहड़ी 5 अगस्त 2019 गी जम्मू-कश्मीर थमां दफा 370 ते 35ए हटाने दे बाद पिच्छले 6एं बरें च आई दिएं सकारात्मक तब्दीलिएं उप्पर आधारित होग। इस बशेश कार्यक्रमें च साढे परौहने होडन साबका प्रशासनिक अधिकारी ते मन्ने-परमन्ने दे समाजी कार्यकर्ता श्री के.बी. जंडेयाल ते वरिष्ठ पत्रकार ते प्रेस क्लब जम्मू दे साबका प्रधान श्री अश्विणी कुमार जेहड़े पिच्छले 6एं बरें दरान जम्मू-कश्मीर च आए दे सकारात्मक बदलावें पर अपने माहिराना बचार सांझे करडन। इस कार्यक्रम दा संचालन करडन साढे न्यूज़ एन्कर कुणाल श्रीवत्स ते विजय बजाज। इस कार्यक्रमें च तुस मीडियम वेव 303 मीटर यानि 990 किलोहर्टज़, एफएम 100 इशारिया 3 मैगाहर्टज़ ते 104 इशारिया 5 मैगाहर्टज़ पर बी सुनी सकदे ओ।

<><><><><><>

## Cricket

क्रिकेट च भारत नै इंग्लैंड खिलाफ एंडरसन तेंदुलकर ट्रॉफी दे अखीरले टेस्ट मैच च 6 रन्जें कन्नै रोमांचक जित हासल करिये 5 मैचें दी श्रृंखला गी 2-2 कननै बरोबरी पर लेई आंदा ऐ। मेजबान इंग्लैंड दी टीम 5में ध्याड़े अपनी दुई पारी च 367 रन्जें पर आल आउट होई गई। भारत दी तरफा मोहम्मद सिराज ते प्रसिद्ध कृष्णा नै बेहतरीन प्रदर्शन करदे होइ अज्ज बाकी रौहंदियां 4 विकेटां हासल कीतियां। पिछले ध्याड़े दा खेड्ड मुक्कने तगर अज्ज इंग्लैंड गी जित लेई 35 रन्जें दी लोड़ ही जिसलै के भारत गी श्रृंखला बरोबर करने आस्तै बकाया रोहंदी 4 विकेटां हासल करनियां हिआं जेदे च भारती गेंदबाज सफल रहे। भारत नै अपनी पैहली पारी च 224 रन्ज बनाए हे। जिसलै के मेजबान इंग्लैंड दी टीम नै अपनी पैहली पारी च 247 रन्ज ते दुई पारी च 367 रन्ज बनाए।

<><><><><><>

## Sericulture-Ramban

मैहकमा रेशम रामबन करसाने गी बरसांतें दी रूतें दरान बी आधुनिक तकनीकें दे इस्तेमाल राहें रेशम दे बेहतर उत्पादन च मदद करै करदा ऐ। मैहकमे आसेआ रेशम उत्पादकें गी तूतें दे बागें चा पानी दे निकास दी बवस्था दे आधुनिक ढंग सरिस्ते बारै बी जानकारी दिती जंदी ऐ। एहदे अलावा बूहटें गी बमारिएं ते खुबटिएं गी खराब होने थमां बचाने लेई सफाई-सुथराई ते होर तकनीकें दे बारै च बी माहिरें आसेआ जानकारी ते सिखलाई बी दिती जंदी ऐ। इस बारै आकाशवाणी कन्नै गल्ल करदे होई जिला रेशम अधिकारी संजय रामेत्रा होरें आखेआ।

<><><><><><>